



GIPUZKOAKO FORU ALDUNDIA

OGASUN ETA FINANTZA DEPARTAMENTUA

154/2023 Foru Agindua, apirilaren 5ekoa, gasolio profesionalaren kontsumoagatik jasandako hidrokarburoen gaineko zerga zati batean itzultzeko prozedura ezartzen duena, eta nekazaritzan eta abeltzaintzan gasolio erosketak direla-eta jasandako hidrokarburoen gaineko zerga itzultzeko prozedura ezartzen duen martxoaren 25eko 274/2010 Foru Agindua aldatzen duena.

Maiatzaren 3ko 243/2022 Foru Aginduaren bidez, gasolio profesionalaren kontsumoagatik jasandako hidrokarburoen gaineko zerga partzialki itzultzeko prozedura ezarri zen, baita gasolio profesionalaren eskurapenei dagozkien itzulketak egiteko epea aldatu ere. Horrela, 2022ko apirilaren 1etik aurrera egindako eskurapenak hilabete natural bakoitza amaitutakoan ordaintzen dira, aurkezten diren horniduren zerrendetatik abiatuta.

Euskal Autonomia Erkidegoarekiko Ekonomia Itunak, maiatzaren 23ko 12/2002 Legearen bidez onetsiak, 33. artikuluan xedatzen duenez, zerga bereziak tributu itunduak dira eta, haiek arautzeko, Estatuak une bakoitzean ezarrita dituen arau substantibo eta formal berak erabiliko dira, Orobat, dio zerga bereziak foru aldundiek ordainaraziko dituztela haien sortzapena Euskadin gertatzen denean. Era berean, ezartzen du ezen lurralde historikoetako erakunde eskudunek eskumena izango dutela aitorpen eta ordainketa ereduak onartzeko eta likidazio aldi bakoitzaren ordainketa epeak zehazteko. Baina eredu horietako datuak, gutxienez, lurralde erkidean erabiltzen diren berberak izan behar dira; eta epe horiek, berriz, ezin dira izan Estatuko Administrazioak ezarritakoez oso bestelakoak.

Lurralde erkidean, joan den urtean urriaren 3ko HFP/941/2022 Agindua onetsi eta argitaratu zen, hain zuzen ere, gasolio profesionalaren kontsumoagatik ordaindutako hidrokarburoen gaineko zerga zati batean itzultzeko prozedura ezartzen duena eta nekazariak eta abeltzainak hidrokarburoen gaineko zergan jasandako kuotak zati batean itzultzeko prozedura ezartzen duen apirilaren 21eko EHA/993/2010 Agindua aldatzen duena.

Agindu berri horrek aldatzen dituen alderdien artean, aipatzekoa da, besteak beste, itzulketa partzialaren prozedura 38/1992 Legearen 52 bis artikuluan ezarritako baldintzak betetzen dituzten ibilgailuen titular guztientzat parekatzen dela, haien bizilekua edonon dagoela ere. Alde horretatik, ezartzen da ezen Espainiako lurraldean egoiliartuta ez dauden onuradunek Europar Batasuneko beste estatu batean baldin badute egoitza edo establezimendu iraunkorra, gasolio profesionalaren itzulketen onuradunen erregistroan inskribatzea eskatzeko ez dutela zertan izendatu Espainiako lurraldean egoiliartutako ordezkari fiskalik, eta onuradun horientzat Espainiako lurraldean egoitza duten onuradunentzat aurreikusitako baldintza berberak ezartzen dira itzulketa eskatzeko.

Horrek beharrezko egiten du lurralde erkideko araudian onartu diren aldaketak gasolio profesionalaren kontsumoagatik jasaten den hidrokarburoen gaineko zergaren zati bat itzultzeko prozeduran sartzea, Gipuzkoako foru esparruan aplikatzen da.

Horrenbestez, hau

XEDATZEN DUT

1. artikulua. Aplikazio eremua.

1. Gipuzkoako Foru Aldundiko Ogasun eta Finantza Departamentuak eskumena izango du Zerga Bereziei buruzko abenduaren 28ko 38/1992 Legearen 52 bis artikuluko 7.a) apartatuan gasolio profesionalaren onuradunei dagokienez aipatzen den erroldan alta, baja eta aldaketa aitortzen izapidetzeko, honako kasu hauetan:

a) Onuradunak Espainian egoiliarak badira, Ekonomia Itunean ezarritako arauen arabera zerga egoitza Gipuzkoan dutenean.

b) Onuradunak ez badira Espainian egoiliarak eta egoitza edo establezimendu iraunkorra Europar Batasuneko beste estatu batean badute, identifikazio fiskaleko zenbakia lortzeko izapideak Foru Aldundiari dagozkionean eta izendaturiko ordezkari fiskalaren zerga egoitza Gipuzkoan dagoenean.

2. Norberaren kontsumorako instalazioetan egiten diren gasolio profesionaleko horniduren zerrenda Ogasun eta Finantza Departamentuari aurkeztuko zaio, itzulketa egin dezan, instalazioaren titularraren zerga egoitza Gipuzkoan dagoenean.

2. artikulua. Definizioak.

Foru agindu honen ondorioetarako, definizio hauek ezartzen dira:

1. «Itzulketaren oinarria». Itzulketaren oinarria izango da baimendutako ibilgailuetan erregai gisa erabiltzeko interesdunak erositako gasolio bolumena, milaka litrotan adierazia.

2. «Gasolio profesionalagatik egiten diren itzulketen onuradunen eta haien titulartasuneko ibilgailuen errolda». Hidrokarburoen gaineko zergaren itzulketa partziala jasotzeko eskubidea duten ibilgailuen titularren errolda da, Zerga Bereziei buruzko abenduaren 28ko 38/1992 Legearen 52 bis.2 artikuluan aipatzen dena.

3. «Gasolio profesionaleko norberaren kontsumorako instalazioen errolda». Artikulu honetako 9. apartatuan aipatzen diren instalazioen errolda da.

4. «Txikizkako identifikazio kodea».

a) Txikizkako identifikazio kodeak (aurrerantzean, TIK) identifikatzen du zein pertsonak edo entitatek daukan horniduraren unean 38/1992 Legearen 52 bis artikuluan aitortzen den itzulketarako eskubidea sor dezakeen gasolioaren titulartasun juridikoa, eta nork saltzen duen produktua txikizkako salmentarako instalazioetan. Kode hori jarraian zehazten den eran konfiguratu da.

b) Kodeak zortzi karaktere izango ditu, honela banatuak:

* Bi digitu, erregistroko inskripzioa txikizkako identifikazio kodearen ondorioetarako zein kudeaketa bulegotan egiten den eta bulego hori identifikatzen dutenak.

* Bi karaktere, garatzen den jarduera identifikatzen dutenak:

— ES: Zerbitzugune.

— SU: Erabilera profesionaleko gasolioa txikizkako salmentarako instalazioetan merkaturatzen dutenak.

* Hiru karaktere alfanumeriko.

* Kontrol letra bat.

5. «Itzulketaren gehieneko zenbatekoa». Artikulu honen 1. apartatuan definitutako itzulketaren oinarria aintzat hartuta, Zerga Bereziei buruzko abenduaren 28ko 38/1992 Legearen 52 bis.6.c) artikuluan ibilgailu eta urte bakoitzeko ezartzen den gehieneko kontsumoari dagokiona (52 bis artikulua, erabilera profesionaleko gasolioari dagokion itzulketa partziala ezartzen duena).

6. «Itzuli beharreko kuotak». Itzulketaren oinarriaren gainean Zerga Bereziei buruzko abenduaren 38/1992 Legearen 52 bis.6 artikuluan aurreikusitako tasa aplikatuztik ondorioztatzen direnak.

7. «Entitate jaulkitzailea». Ordainbideak jaulkitzeari buruzko araudia betez eta Zerga Administrazioak aurrez baimenduta, gasolio profesionaleko txartela jaulkitzen duen pertsona edo entitatea da.

8. «Gasolio profesionala». Erabilera orokorreko gasolioa, Zerga Bereziei buruzko abenduaren 28ko 38/1992 Legearen 52 bis.2 artikuluan aipatzen diren ibilgailuen motorrean erregai gisa erabiltzen dena.

9. «Norberaren kontsumorako instalazioa». Erabilera orokorreko gasolioaren kontsumo propiorako hornidura puntu bat duen establezimendua, gasolio hori norberaren kontsumorako instalazioaren titularrak baimenduak dituen ibilgailuen motorretan erregai gisa erabiltzen denean.

10. «Txikizkako salmentarako instalazioa». Erabilera orokorreko gasolioa publikoak zuzenean kontsumitzeko salmenta instalazio finkoak dituen establezimendua, petrolio produktuak merkaturatzeko gaietan indarrean dagoen araudiari jarraituta jarduera horretan aritzeko behar bezala baimenduta dagoena.

11. «Erreferentziazko epealdia». Hilabete naturala.

12. «Gasolio profesionaleko txartela». Zordunketa, kreditu edo erosketak txartela, txikizkako salmenta instalazioetan gasolio erosketak egiteko Zerga Administrazioak ordainbide espezifiko gisa baimendu duena eta zergaren itzulketa eskatzea dakarrena. Bertan adierazten den ibilgailu baimendua hornitzeko balio du soil-soilik. Txartelak «gasolio profesionala» esapidea erakutsi behar du ongi ikusteko moduan.

13. «Itzulketaren tasa». Zerga Bereziei buruzko abenduaren 28ko 38/1992 Legearen 52 bis.6 artikuluan aipatzen dena izango da (52 bis artikulua, erabilera profesionaleko gasolioari dagokion itzulketa partziala ezartzen duena).

14. «Baimendutako ibilgailuaren titularra». Baimendutako ibilgailuaren titulartzat hartuko da garraio arloko agintari eskudunen erregistroetan edo trafikoaren, bide segurtasunaren eta ibilgailu motordunen zirkulazioaren arloko agintaritzaren eskudunen erregistroetan halakotzat agertzen den pertsona edo entitatea, dagokionaren arabera.

15. «Baimendutako ibilgailua». Erabilera profesionaleko gasolioagatik jasandako hidrokarburoen gaineko zergaren itzulketa partziala jasotzeko, Zerga Bereziei buruzko abenduaren 28ko 38/1992 Legearen 52 bis.2 artikuluan ezarritako baldintzak betetzen dituzten ibilgailuak.

3. artikulua. Gasolio profesionalagatik egiten diren itzulketen onuradunen eta haien titulartasuneko ibilgailuen errolda.

1. Zerga Bereziei buruzko 38/1992 Legearen 52 bis artikuluan (erabilera profesionaleko gasolioari dagokion itzulketa partziala) aipatzen diren ibilgailuen titularrek, ibilgailu horien motorretan gasolio profesionala kontsumitu aurretik, izena emanda egon beharko dute gasolio profesionalagatik egiten diren itzulketen onuradunen eta haien titulartasuneko ibilgailuen erroldan.

2. Errolda horretan izena emateko, eskaera bat aurkeztu beharko da.

Interesdunak behartuta badaude Zerga Administrazioarekiko harremanetan bitarteko elektronikoko erabiltzera ekainaren 28ko 320/2017 Foru Aginduak, Gipuzkoako Lurralde Historikoko zergen Foru Administrazioarekiko harremanetan bitarteko elektronikoko erabiltzeko obligazioa ezartzen duenak, xedatutakoaren arabera, elektronikoki egin beharko dute eskaera, Internet bidez, «Zergabidea» plataforma erabiliz, Gipuzkoako Foru Aldundiaren egoitza elektronikoa edo Ogasun eta Finantza Departamentuaren webgunean sartuta. Foru agindu horretan jasotako prozeduraren eta baldintzen arabera egingo da aurkezpena.

Betebehar hori ez duten interesdunek elektronikoki zein paperean aurkeztu ahal izango dute eskaera. Paperezko euskarriak foru agindu honetan I. eranskin gisa jasotzen den formatua izan beharko du.

Eskaera horretan datu hauek adierazi beharko dira:

a) Eskatzailearen identifikazio fiskaleko zenbakia (IFZ). Ordezkarri bidez jarduten bada, eskatzailearen ordezkarri fiskalaren IFZ eta izena edo sozietate izena.

b) Eskatzailearen izena edo sozietate izena, telefonoa eta zerga egoitza.

c) Jarduera zein egunetan hasi den, eta hala badagokio, baja noiz eman zaion.

d) Finantza entitatearen eta banku kontuaren identifikazioa (IBAN formatuan), itzulketen ordainketa bertan egiteko. Nazioarteko kontu korronteen kasuan, SWIFT kodea jarriko da.

e) Datu hauek, gasolio profesionala kontsumitzen den ibilgailu bakoitzeko:

1.—Ibilgailuaren matrikula.

2.—Matrikulatuta dagoen Europar Batasuneko herrialdea.

3.—Ibilgailuaren jarduera noiz hasi den edo, hala badagokio, noiz amaitu den.

4.—Ibilgailuaren gehieneko pisu baimendua.

5.—Espainiako matrikularekin salgaien garraiorako erabiltzen diren ibilgailuen kasuan, araudian garraio txartela eskatzen bazaie, haien txartelaren zenbakia jarriko da.

6.—Espainiako matrikularekin pertsonen garraiorako erabiltzen diren ibilgailuen kasuan, araudian «enpresaren baimena» eskatzen bazaie, baimenaren zenbakia adieraziko da.

7.—Administrazio baimenik ez duten taxien kasuan, baimen horren ordez, udal lizentziaren zenbakia jarriko da, baita zein udalerriri dagokion ere.

8.—Europar Batasuneko gainerako estatueta matrikulatutako ibilgailuetan, haien estatuko araudian baimen administratiboa eskatzen bazaie garraio jarduera egiteko, haren zenbakia jarriko da, baita baimena zer organismok eman duen ere.

3. Inskribatzeko eskaerak izapidetu ondoren egoki dela jotzen bada, inskripzioa egingo da gasolio profesionalagatik egiten diren itzulketen onuradunen eta haien titulartasuneko ibilgailuen erroldan.

Eskaerak aurkeztu eta sei hilabeteko epean ez bada inskripziorik egin, ezetsizat joko dira eskaerak.

4. Hasierako eskaeran adierazitako datuetan edo eskaeran aipatutako dokumentazioan jasotakoetan gerora aldaketaren bat egiten bada, haren berri eman beharko da, hamar eguneko epean, aldaketa eragin duten inguruabarrak gertatzen direnetik aurrera kontatuta. Horretarako, bide hauetako bat erabili ahal izango da: paperezko euskarria, artikulua honen aurreko bigarren puntuan jasotakoagatik hori posible denean, edo, bestela, bitarteko elektronikoak, Internet bidez.

Era berean, baimendutako ibilgailuen titularrek itzulketarako eskubidea ematen duen jarduera uzten badute, baja eskatu beharko dute gasolio profesionalagatik egiten diren itzulketen onuradunen eta haien titulartasuneko ibilgailuen erroldan, jarduerari utzi eta hamar eguneko epean.

Ondorio horietarako, baimendutako ibilgailuen titularraren heriotzak, titularraren nortasun juridikoa azkentzeak edo itzulketarako eskubidea sortzen duen jarduerari enpresaburu, profesional eta atxikitzaileen erroldan baja emateko eskaera aurkezteak baja eskaerari dagozkion ondorioak eragingo dituzte.

Era berean, baimendutako ibilgailuetarako garraio baimen administratiboei edo kasu bakoitzean exijigarri diren lizentziei baja emateak edo ibilgailu horiek itzulketarako eskubidea ematen duen jarduera betetzeko erabileratik kanpo uzteak baja eskaeraren ondorioak izango ditu.

Ogasun eta Finantza Departamentuak ofizios jardun ahal izango du gasolio profesionalagatik egiten diren itzulketen onuradunen eta haien titulartasuneko ibilgailuen erroldan inskribatutako onuradun eta ibilgailuen aldaketak edo bajak egiteko.

4. artikulua. Gasolio profesionaleko txartelak baimentzea.

1. Gasolio profesionaleko txartelak Zerga Administrazioiko Estatu Agentziak baimendu beharko ditu, itzulketaren xede den gasolioa erosteko ordainbide espezifikoa gisa erabili daitezela. Horretarako, entitate jaulkitzaileek eskatu beharko dute txartel horiek gasolio profesionaleko txartelen erregistroan inskribatu daitezela, eta inskripzio kode bat emango zaie, Zerga Administrazioiko Estatu Agentziarekin dituzten komunikazioetan erabiltzeko. Inskripzio hori entitate batek izen komertzial berberarekin jaulkitzen dituen txartel guztietarako baimena izango da.

2. Baimenaren eskaerari eta haren baliozkotasunari dagokienez, aintzat hartzekoa izango da urriaren 3ko HFP/941/2022 Agindua, erabilera profesionaleko gasolioagatik jasandako hidrokarburoen gaineko zerga zati batean itzultzeko prozedura ezartzen duena eta nekazariek eta abeltzainek hidrokarburoen gaineko zergan jasandako kuotak zati batean itzultzeko prozedura ezartzen duen apirilaren 21eko EHA/993/2010 Agindua aldatzen duena.

5. artikulua. Erregistroan inskribatzea txikizkako identifikazio kodearen ondorioetarako.

1. Gasolio profesionala txikizkako salmenta instalazioetan merkaturatzen duten pertsona edo entitateek, hornidurak egiteko unean gasolioaren titulartasun juridikoa badute, erregistroan inskribatzeko eskaera bat aurkeztu beharko dute, Txikizkako Identifikazio Kodearen (TIK) ondorioetarako, gasolio profesionalaren salmentak egingo diren instalazio bakoitzeko.

Inskripzioa egin aurretik, eskatzaileak alta emanda egon beharko du enpresaburu, profesional eta atxikitzaileen erroldan (garatu beharreko jarduerari dagokion epigrafean), bere zerga betebeharretan egunean dagoela frogatu beharko du zerga araudian ezarritako moduan, eta Hidrokarburoen sektoreari buruzko urriaren 7ko 34/1998 Legean eta hura garatzeko araudian ezarritakoaren arabera bere kasuan exiji daitezkeen baimenak eduki behar ditu.

2. Interesdunak behartuta badaude Zerga Administrazioarekiko harremanetan bitarteko elektronikoak erabiltzera ekainaren 28ko 320/2017 Foru Aginduak, Gipuzkoako Lurralde Historikoko Zergen Foru Administrazioarekiko harremanetan bitarteko elektronikoak erabiltzeko obligazioa arautzen duenak, xedatzen duen bezala, txikizkako salmenta instalazioetan gasolio profesionala merkaturatzen hasi aurretik, inskribatzeko eskaera elektroniko bat egin beharko dute, «Zergabidea» plataforma erabiliz, Gipuzkoako Foru Aldundiaren egoitza elektronikoan edo Ogasun eta Finantza Departamentuaren webgunean sartuta. Eskaera Idazkiak fitxatik igorriko da, eta Gipuzkoako Foru Aldundiko Zeharkako Zergak, Eskualdaketen gaineko Zergak eta Ingurumen Tributuak kudeatzen dituen Zerbitzuari zuzenduko zaio. Foru agindu horretan jasotako prozeduraren eta baldintzen arabera egingo da aurkezpena.

Betebehar hori ez duten interesdunek elektronikoki zein paperean aurkeztu ahal izango dute eskaera.

Eskaera horretan, datu hauek adierazi beharko dira:

- a) Eskatzailearen identifikazio fiskaleko zenbakia (IFZ).
- b) Eskatzailearen izena edo sozietate izena eta egoitza fiskala.
- c) Ordezkaritza bidez jarduten bada, eskatzailearen ordezkari fiskalaren IFZ eta izena edo sozietate izena.
- d) Erabilera profesionaleko gasolio salmentak egiteko erabiliko den txikizkako salmenta instalazioaren titularrak eta kokapena.

3. Eskaera jaso, eta behar den espedientea tramitatu ondoren, Zerga Administrazioak erabakiko du, bidezkoa bada, erregistroan inskripzioa egitea txikizkako identifikazio kodearen ondorioetarako.

Inskripzioa egiteko erabakia interesdunari jakinaraziko zaio, esleitu den txikizkako identifikazio kodea ere barne.

4. Inskripziorako emandako datuetan aldaketaren bat gertatzen bada, txikizkako identifikazio kodearen titularrak haren berri eman beharko dio Zerga Administrazioari, aldaketa eragin duten inguruabarrak gertatu eta hamar eguneko epean.

5. Gasolio profesionala txikizkako salmenta instalazioetan saltzen dutenek inskripzioa ekarri zuen jarduera egiteari uzten badiote, inskripzioaren baja eskatu beharko dute jarduerari utzi eta hamar eguneko epean.

Ondorio horietarako, titularra hiltzeak edo inskripzioa ekarri zuen jarduera enpresarial edo profesionala egiteari uzteak baja eskaeraren ondorioak izango dituzte.

Era berean, inskripzioaren xede den jarduerari enpresaburu, profesional eta atxikitzaileen erroldan baja emateko eskaera aurkezteak baja eskaerak dituen ondorioak izango ditu.

Zerga Administrazioak egiaztatzen badu txikizkako salmenta instalazioetan gasolio profesionala merkaturatzeko jarduera ez dela modu efektiboan egiten ari, zilegi izango du errebokatzea erregistroan txikizkako identifikazio kodearen ondorioetarako egindako inskripzioa.

6. artikulua. Gasolio horniketa txikizkako salmenta instalazioetan.

Ibilgailu baimenduek txikizkako salmenta instalazioetan egiten dutenean gasolio horniketa, itzulketak aitortza eta eraginkortasuna izan ditzan, gasolio profesionalako txartelarekin ordaindu beharko dute instalazio horietan hornitutako gasolioa.

Ondorio horietarako, onuradunek txartel hori ordaintzeko erabiltzea itzulketa eskatzeko aurkezten den zerga aitortzentzat hartuko da.

Gasolio profesionalako txartela ordainbide gisa onartzen duten instalazioen titularrek foru agindu honen 7.1 artikuluko b), c), d), e) eta f) letretan adierazten den informazioa eman beharko diete txartelak jaulkitzen dituzten entitateei, erreferentziazko epealdi bakoitzean egindako hornidura bakoitzeko.

7. artikulua. Txikizkako salmenta instalazioetan egindako gasolio horniketen zerrenda.

1. Txartelak jaulkitzen dituzten entitateek, gasolio profesionalaren horniketak egin eta astebeteko epean, txikizkako salmenta instalazioetan egindako horniketa horiei buruzko informazioa bidali behar diote Zerga Administrazioako Estatu Agentziari.

Informazio hori bidaltzeko, urriaren 3ko HFP/941/2022 Aginduan ezarritako zehaztapen teknikoak hartu beharko dira kontuan, eta bertan aipatzen diren datuak jaso beharko ditu (HFP/941/2022 Agindua, gasolio profesionalaren kontsumoagatik ordaindutako hidrokarburoen gaineko zerga zati batean itzultzeko prozedura ezarri duena eta nekazariek eta abeltzainek hidrokarburoen gaineko zergan jasandako kuotak zati batean itzultzeko prozedura ezartzen duen apirilaren 21eko EHA/993/2010 Agindua aldatzen duena). Zehazki, hornidura bakoitzeko, datu hauek adierazi beharko dira:

- a) Egindako hornidura islatzen duen kontabilitate erregistroaren identifikatzaile unibokoa edo, kasua bada, eginiko doiketa positibo edo negatiboarena.
- b) Hornidura zein pertsona edo entitateren kontura egiten den, eta haren txikizkako identifikazio kodea (TIK).
- c) Ibilgailu baimenduaren matrikula.
- d) Ibilgailuaren titularraren identifikazio fiskaleko zenbakia (IFZ).
- e) Hornidura zein egunetan eta zein ordutan egin zen.
- f) Hornitutako gasolio profesionalaren litro kopurua.

2. Entitate jaulkitzaileen erantzukizuna izango da bidalitako horniduretan jasotzen diren datuak eta gasolio profesionalako txartelaren erabileratik ondorioztatzen direnak bat etortzea.

3. Hornidurei buruzko datuetan akatsak badaude eta hornidura horiek errefusatzeko badaukate, entitate jaulkitzaileak datu horiek zuzendu beharko ditu eta berriro bidali.

8. artikulua. Gasolio horniketa norberaren kontsumorako instalazioetan.

Foru agindu honen 2.9 artikuluan aipatzen diren norberaren kontsumorako instalazioen titularrak foru agindu honen 3. artikuluan aipatutako erroldan sartuta badaude eta erositako gasolioaren kontsumo propiorako hornidura puntu bat baldin badute, baldintza hauek bete beharko dituzte itzulketa hori lortzeko:

a) Ogasun eta Finantza Departamentuaren erregistroan inskribatzea, uztailaren 7ko 1165/1995 Errege Dekretuaren bidez onetsitako Zerga Berezien Erregelamenduko 40. eta 41. artikuluetan ezarritakoaren arabera, baldin eta instalazioa Gipuzkoan kokatuta badago.

b) Horniketa aparatuekin integratuta egon den kontabilitate sistema informatiko bat edukitzea, zeinak ahalbidetu behar baitu instalazio horietan jasotako gasolioaren mugimendua islatzea eta horniketa bakoitzaren datu zehatzak lortzea, 7. artikuluan ezarritakoari jarraituz. Kontabilitate sistema horrek datu hauek izan beharko ditu:

1. Kasu bakoitzean jasotako erabilera orokorreko gasolio kantitatea, honako hauek adierazita: jasotze data, hornitzailearen izena edo sozietate izena, IFZ, eta, hala badagokio, jarduera eta establezimendu kodea (JEK). Orobat, erabilera orokorreko gasolioaren zirkulazioa norberaren kontsumorako instalazioraino lagundu duen zirkulazio agiriaren erreferentzia ere adieraziko da.

2. Instalazioaren titularraren ibilgailu baimenduei egindako hornidurak edo depositu betetze guztiak, haien matrikula adieraziz eta foru agindu honen 7. artikuluan aipatzen diren gainerako datuak ere jarritz. Alabaina, TIK kodearen ordean norberaren kontsumorako instalazioari dagokion JEK kodea jarriko da.

c) Instalazioaren titularraren ibilgailu baimenduei egiten zaizkien gasolio horniduren zerrenda Internet bidez aurkeztea, «Zergabidea» plataformatik abiatuta. Zerrenda Idazkiak fitxatik igorriko da, eta Gipuzkoako Foru Aldundiko Zeharkako Zergak, Eskualdaketan gainerako Zergak eta Ingurumen Tributuak kudeatzen dituen Zerbitzuari zuzenduko zaio.

9. artikulua. Norberaren kontsumorako instalazioetan egindako gasolio horniduren zerrenda:

1. Norberaren kontsumorako instalazioen titularrak foru agindu honen 3. artikuluan aipatutako erroldan sartuta badaude eta erositako gasolioaren kontsumo propiorako hornidura puntu bat baldin badute, itzulketa lortzeko, instalazioaren titularraren ibilgailu baimenduei egiten dizkieten horniduren zerrenda aurkeztu beharko dute, erreferentziatzeko epealdi bakoitza amaitu eta astebeteko epean.

2. Aurreko apartatuan aipatzen den zerrenda elektronikoki aurkeztuko da, Gipuzkoako Foru Aldundiaren «Zergabidea» plataforma erabiliz, Idazkiak fitxan sartuta, eta Zeharkako Zergak, Eskualdaketan gainerako Zergak eta Ingurumen Tributuak kudeatzen dituen Zerbitzuari zuzenduta. Fitxategian datu hauek adierazi beharko dira:

a) Norberaren kontsumorako instalazioaren titularraren identifikazio fiskaleko zenbakia (IFZ).

b) Zerga ekitaldia: zerrenda zein epealdikoa den eta hari dagokion urteko lau zifrak.

c) Epealdia: erreferentziatzeko hilabetea.

b) Egindako hornidura bakoitzeko, foru agindu honen 7.1 artikuluan zehaztutako informazioa aurkeztuko da, TIK kodea izan ezik, haren ordean norberaren kontsumorako instalazioari dagokion

JEK kodea jarriko baita.

10. artikulua. Egindako horniketengatik ordaindutako kuotak itzultzea.

1. Hilabete natural bakoitza amaituta, eta aurreko 7. eta 9. artikuluen arabera aurkeztu diren zerrendetan oinarrituta, Ogasun eta Finantza Departamentuak kasuan kasuko kuotak itzultzea erabakiko du, hala badagokio, eta itzulketa hori banku transferentzia bidez egingo du gasolio profesionalagatik egiten diren itzulketen onuradunen eta haien titulartasuneko ibilgailuen erroldan inskribatzeko eskaeran onuradunak aurrez adierazitako kontura.

2. Itzulketa kalkulatzeko, hornidura egin zen egunean indarrean zegoen itzulketa tasa aplikatuko da.

11. artikulua. Egindako kilometroen urteko aitorpena.

1. Itzulketarako eskubidea duen onuradunak, urte naturala amaitu eta hurrengo urteko lehen hiruhilekoaren barruan, urteko aitorpen bat aurkeztu beharko du Ogasun eta Finantza Departamentuan, hurrengo apartatuetan adierazitako moduan, bertan adieraziz guztira zenbat kilometro egin diren aitortzen den urteko urtarrilaren 1etik abenduaren 31 bitartean, gasolio profesionalagatik egiten diren itzulketen onuradunen eta haien titulartasuneko ibilgailuen erroldan aurreko urtean inskribatuta izan dituen ibilgailuetako bakoitzagatik. Takografoa erabili behar duten ibilgailuen kasuan, takografotik lortuko da datu hori.

Interesdunak behartuta badaude Zerga Administrazioarekiko harremanetan bitarteko elektronikoak erabiltzera ekainaren 28ko 320/2017 Foru Aginduak, Gipuzkoako Lurralde Historikoko Zergen Foru Administrazioarekiko harremanetan bitarteko elektronikoak erabiltzeko obligazioa ezartzen duenak, xedatutakoaren arabera, KAR aitorpena aurkeztu beharko dute elektronikoki, Internet bidez, «Zergabidea» plataforma erabiliz, Gipuzkoako Foru Aldundiaren egoitza elektronikoan edo Ogasun eta Finantza Departamentuaren webgunean sartuta. Foru agindu horretan jasotako prozeduraren eta baldintzen arabera egingo da aurkezpena.

Betebehar hori ez duten interesdunek elektronikoki zein paperean aurkeztu ahal izango dute aitorpena. Paperezko euskarriak foru agindu honetan II. eranskin gisa jasotzen den formatua izan beharko du.

2. Ibilgailuak ez badira izan onuradun beraren jabetzakoak ekitaldi oso batean, zerrenda hori benetako titulartasun denborari buruzkoa baino ez da izango.

3. KAR aitorpenaren aurkezpenean datu hauek adieraziko dira:

a) Onuradunaren identifikazio fiskaleko zenbakia (IFZ), izena edo izen soziala, telefonoa eta zerga egoitza.

b) Zerga ekitaldia, aitortzen den epealdiari dagokion urteko lau zifrek osatua.

c) Ekitaldian baimendutako ibilgailu bakoitzeko: matrikulazioko herrialdea, matrikula, eta hasierako eta amaierako kilometro kopuruak titulartasunaren denbora tartean.

Lehen xedapen gehigarria. Datu pertsonalen tratamendua.

Bere eskubideak eta zerga betebeharrak betez zergapekoak ematen dituen datu pertsonalak zerga sistema aplikatzeko tratatuko dira. Tratamendu horrek bat etorri beharko du Europako Parlamentuaren eta Kontseiluaren apirilaren 27ko 2016/679/EB Erregelamenduarekin eta Datu Pertsonalen Babesari eta eskubide digitalen bermeari buruzko abenduaren 5eko 3/2018 Lege Organikoarekin.

Bigarren xedapen gehigarria. Txikizkako identifikazio kodeak ofizioz aldatzea.

Foru agindu hau aplikatuta, beharrezko gertatzen bada aldatzea erregistroan txikizkako identifikazio kodearen (TIK) ondorioetarako aktibo dauden kode batzuk, kode horiek baliodunak eta eraginkorrak izango dira harik eta, Zerga Administrazioak, aurrekoak ordeztu edo aldatzeko inskripzio txartelak jaulkitzeari begira, behar diren jarduketak ofizioz egin arte.

Xedapen indargabetzailea bakarra.

Indargabeturik geratzen dira foru agindu honetan xedatutakoarekin bat ez datozen maila bereko edo beheragoko xedapen guztiak, eta, bereziki, honako hauek:

1. 292/2008 Foru Agindua, martxoaren 18koa, «Urtean egindako kilometroak. Gasolio profesionala» izeneko aitorpena aurkezteko eredia eta prozedurak onartzen dituenak.»

2. 243/2022 Foru Agindua, maiatzaren 3koa, gasolio profesionalaren kontsumoarengatik ordaindutako hidrokarburoen gaineko zerga partzialki itzultzeko prozedura ezartzen duena.

Azken xedapenetako lehena. Aldatzea 274/2010 Foru Agindua, martxoaren 25ekoa, nekazaritzan eta abeltzaintzan gasolio erosketak direla-eta jasandako hidrokarburoen gaineko zerga itzultzeko prozedura ezartzen duena.

3. artikulua 2. apartatuko a) letraren 4. epigrafea aldatzen da martxoaren 25eko 274/2010 Foru Aginduan, nekazaritzan eta abeltzaintzan gasolio erosketak direla-eta jasandako hidrokarburoen gaineko zerga itzultzeko prozedura ezartzen duen horretan, eta honela geratzen da:

«4. Gasolio hobarituaren erosketak gasolio hobaritutako txikizkako saltzaileei egin eta uztailearen 7ko 1165/1995 Errege Dekretuaren bidez onetsitako Zerga Berezien Erregelamenduko 107. artikuluan aipatzen diren ordainbide espezifikoak erabiliz ordaindu badira, aitortzaileak, establezimendu berean egin eta gasolio hobarituaren txartelak edo txekeak erabiliz ordaindu diren erosketak guztiak aintzat hartuta, modu globalean zehaztu beharko du guztira zenbat litro gasolio hobaritu erosi diren, eta datu hori eskaeran adierazi; datu horrekin batera, honako hauek ere jarri beharko ditu: ordainbide horiek erabiliz ordaindutako zenbateko osoa, eta gasolio hobaritua erosi den txikizkako establezimenduaren Jarduera eta Establezimendu Kodea (JEK).

Gasolio hobarituaren erosketak ez badira egin gasolio hobaritutako txikizkako saltzaileen establezimenduetan, aitortzaileak datu hauek adierazi beharko ditu, hornidura bakoitzeko edo faktura berean bildutako hornidura multzo bakoitzeko: fakturaren zenbakia eta data, erregaia erosi den establezimenduaren jarduera eta establezimendu kodea (JEK), erositako gasolio hobarituaren litro kopurua eta ordaindutako zenbatekoa, biak bi dezimalekin biribilduta.»

Azken xedapenetako bigarrena. Indarrean jartzea.

Foru agindu hau Gipuzkoako ALDIZKARI OFIZIALEAN argitaratu eta biharamunean jarriko da indarrean.

Donostia, 2023ko apirilaren 5a.—Ogasun eta Finantza Departamentuko foru diputatua. (2661)



II. ERANSKINA

